



**USAID**  
OD AMERIČKOG NARODA

# JAVNI POZIV ZA DOSTAVLJANJE PROJEKTNIH PRIJEDLOGA

|  |   |
|--|---|
| Oznaka poziva:                             | 20.04.0-N2.3-499  |
| Naziv poziva:                              | <b>Podrška aktivnostima nevladinih organizacija u borbi protiv trgovine ljudima</b> |
| Rok za dostavljanje projektnih prijedloga: | 15. 4. 2021. do 16.00 sati  |



## Javni poziv za dostavljanje projektnih prijedloga

Kroz Program podrške zaštiti ljudskih prava (USAID/INSPIRE), Američka agencija za međunarodni razvoj (USAID) osnažuje građane i vlasti u BiH kako bi unaprijedili zaštitu ljudskih prava te pružili bolje usluge i prilike za zapošljavanje marginaliziranim grupama u Bosni i Hercegovini. USAID/INSPIRE nastavlja se na postignuća USAID-ovog Programa podrške marginaliziranim grupama (2015-2020). Ovaj program gradio je kapacitete nevladinih organizacija za saradnju s vlastima na svim nivoima. Program je pružio podršku zagovaranju sistemskih rješenja za probleme s kojima se suočavaju marginalizirane grupe. Marginalizirane grupe u BiH susreću se i dalje s velikim izazovima. Zato je ključno kontinuirano pružiti podršku onima kojima je potrebna, među kojima se nalaze i žrtve trgovine ljudima.

USAID/INSPIRE poziva nevladine organizacije registrirane u Bosni i Hercegovini (udruženja i fondacije osnovane prema zakonima o udruženjima i fondacijama u BiH) da dostave svoje projektne prijedloge u okviru komponente za pružanje **Podrške aktivnostima nevladinih organizacija u borbi protiv trgovine ljudima**.

Na Javni poziv ne mogu se prijaviti: javne ustanove, institucije vlasti, privredna društva, vjerske organizacije, politički subjekti, kao ni međunarodne nevladine organizacije koje nemaju registrirano svoje predstavništvo u Bosni i Hercegovini u skladu sa zakonima o udruženjima i fondacijama u BiH.

Sve projektne aktivnosti moraju se realizirati u Bosni i Hercegovini.

Projektne prijedlozi mogu se dostavljati za cjelokupni ili djelomični iznos sredstava potrebnih za implementaciju kandidiranog projekta.

Ukupni raspoloživi fond sredstava po ovom javnom pozivu iznosi 750.000 BAM. Minimalni iznos sredstava koja se traže od USAID/INSPIRE ne može biti manji od 50.000 BAM, a maksimalan iznos traženih sredstava ne može prelaziti 250.000 BAM. Trajanje projekta ne može biti kraće od 6 mjeseci ni duže od 24 mjeseca.

Sva pitanja koja se tiču ovog javnog poziva dostavljaju se isključivo putem e-mail adrese: [prijava@usaidinspire.ba](mailto:prijava@usaidinspire.ba), subject/predmet: 20.04.0-N2.3-499, Upit) do 9.4.2021. godine.

Puni tekst Javnog poziva kao i svi potrebni obrasci dostupni su na online platformi za upravljanje grantovima APPLY na linku: <https://kult.smapply.io/res/p/komponenta1>.

Od aplikanta se traži da **do 15. 4. 2021. do 16.00 sati** dostave nacrt projektnog prijedloga u elektronskom obliku, sa svim traženim priložima, nakon što se registruju kao organizacija (*organisation*) na online platformi za upravljanje grantovima APPLY. U sklopu aplikacije trebaju popuniti sve podatke o svojoj organizaciji i odabrati komponentu na koju apliciraju unutar programa USAID/INSPIRE, nakon čega će odmah dobiti automatski e-mail kao potvrdu o prijemu aplikacije. Nacrti projektnih prijedloga koji ne budu dostavljeni na navedeni način i do navedenog roka neće biti uzeti u razmatranje.

Napomena: Svi potencijalni aplikanti trebaju pristupiti registraciji na online platformi za upravljanje grantovima APPLY čim prije, kako bi se upoznali s uvjetima i tehničkim postavkama aplikacije, a putem linka: <https://KULT.smapply.io/prog/inspire>. Molimo vas da taj link spasite u svoje kratice (*bookmarks*) ako namjeravate aplicirati na USAID/INSPIRE sada ili u budućnosti, a detaljne instrukcije o procesu registracije možete pronaći na linku: <https://kult.smapply.io/res/p/tehnicke-instrukcije/>.

Aplikanti se mole da pažljivo pročitaju tekst Javnog poziva prije nego što počnu s procesom apliciranja i prije nego što pošalju svoj projektne prijedlog.



## Pozadina borbe protiv trgovine ljudima u BiH

Trgovina ljudima prvenstveno je kriminalna aktivnost, koja često ima karakteristike organiziranog i prekograničnog kriminaliteta, ali je i ujedno i teško kršenje ljudskih prava zagarantiranih međunarodnim pravom, Ustavom BiH, entitetskim ustavima i Statutom Brčko Distrikta BiH.<sup>1</sup>

Izveštaj o trgovini ljudima 2020. je godišnji izvještaj Sjedinjenih Američkih Država, koji se objavljuje od 2000. g., te rangira države prema njihovom angažmanu u borbi protiv trgovine ljudima. Države u nivou 1 ispunjavaju minimalne međunarodne standarde u ovoj oblasti, u nivou 2 su države koje ne ispunjavaju međunarodne standarde, ali se značajno angažiraju i u nivou 3 su države koje se ne angažiraju značajno na ovom pitanju. S obzirom da su vlasti u BiH dodijelile dovoljno resursa za pisani plan koji će, ako bude proveden, predstavljati značajna nastojanja u pravcu ispunjenja minimalnih standarda, Bosni i Hercegovini je prema Zakonu o zaštiti žrtava trgovine ljudima odobreno izuzeće od spuštanja na nivo 3. Bosna i Hercegovina ostaje na nivou 2 Nadzorne liste treću godinu zaredom, jer ne ispunjava minimalne međunarodne standarde, ali značajno nastoji poboljšati situaciju, iako ima sve veći broj žrtava.

Trgovci ljudima podvrgavaju punoljetne i maloljetne ženske osobe iz BiH trgovini ljudima u svrhu seksualnog iskorištavanja unutar zemlje u privatnim stanovima i motelima. Marginalizirana romska djeca iskorištavaju se za prisilno prosjačenje, pružanje seksualnih usluga i služenje u domaćinstvu u prisilno sklopljenim brakovima. Žene i djevojke iz evropskih zemalja podvrgavaju se trgovini ljudima u svrhu seksualnog iskorištavanja unutar zemlje. Trgovci podvrgavaju žrtve iz BiH trgovini u svrhu seksualnog iskorištavanja i prisilnog rada u sektoru građevinarstva i drugim sektorima u susjednim balkanskim zemljama i u zemljama širom Evrope. Na hiljade migranata i izbjeglica iz Afganistana, Bangladeša, Iraka, Maroka, Sirije i susjednih zemalja, posebno žene i djeca bez pratnje koji prolaze kroz BiH ili su zaglavljani u BiH ili se krijumčare kroz zemlju, u opasnosti su da postanu žrtve trgovine ljudima.<sup>2</sup>

Vlasti u BiH su u toku 2020. g. identificirale 70 potencijalnih žrtava trgovine ljudima, u odnosu na 61 njih prethodne godine. Od ukupnog broja, 35 žrtava su punoljetne, a 35 žrtava su maloljetne. Evidentirani su sljedeći oblici eksploatacije: 38 prosjačenja, 17 seksualno iskorištavanih i 15 drugih oblika iskorištavanja. 7 žrtava su strani državljani, a 63 žrtve su državljani Bosne i Hercegovine.

Istrage i krivična gonjenja nisu bila usmjerena na žrtve, a Udarna grupa za borbu protiv trgovine ljudima i dalje je neefikasna. Osim toga, vlasti su izricale presude žrtvama i nisu dodjeljivale godišnja sredstva nevladinim organizacijama za zaštitu žrtava, dok organizacije koje pružaju pomoć žrtvama i dalje nemaju resurse i nisu bile u stanju pružiti pomoć svim domaćim žrtvama.<sup>3</sup>

Organi za provođenje zakona naveli su da su kapaciteti i stručno znanje nedovoljni, što im onemogućava da provode djelotvorne istrage. Nadležni organi i dalje redovno vode istrage i podižu optužnice za djela seksualnog iskorištavanja, prisilnog prosjačenja i trgovine ljudima u koja su uključeni članovi porodica, kvalificirajući ih kao lakša djela, a također i za djela „poticanje na prostituciju“, „zanemarivanje djeteta“ i „poticanje na dječiju prostituciju“. U nekim slučajevima organi su kvalificirali djela povezana s trgovinom ljudima kao lakša djela zbog nespremnosti nekih žrtava, posebno žrtava iz romske zajednice, da sarađuju. Organi za provođenje zakona izvijestili su o teškoćama u istragama

<sup>1</sup> Vijeće ministara BiH, Strategija suprotstavljanja trgovini ljudima u Bosni i Hercegovini 2020 – 2023.

<sup>2</sup> <https://ba.usembassy.gov/wp-content/uploads/sites/270/Izvjestaj-o-trgovini-ljudima-BOS-2020.pdf>, pristupljeno 18. 2. 2021.

<sup>3</sup> <https://ba.usembassy.gov/wp-content/uploads/sites/270/Izvjestaj-o-trgovini-ljudima-BOS-2020.pdf>, pristupljeno 18. 2. 2021.



trgovine ljudima koje se provode u više kantona ili u oba entiteta, uslijed nedostatka komunikacije i koordinacije s kantonalnim tužiteljima.

Dva podzakonska akta propisuju standardne operativne procedure za identifikaciju i upućivanje žrtava na druge službe, uključujući i listu općih pokazatelja, ali su promatrači izvijestili o tome da službenici koji prvi dolaze u kontakt s potencijalnim žrtvama ne znaju koristiti smjernice ili ih ne primjenjuju konzistentno i da ne posjeduju znanje da bi izvršili tačnu identifikaciju žrtava trgovine ljudima. Vlasti vode sedam dnevnih centara za djecu i mobilni tim za djecu koja obavljaju rad na ulici koji je proveo aktivnosti na terenu na pronalasku djece u skitnji i prosjačenju u Sarajevu. Mobilni tim zatekao je 160 djece u skitnji i prosjačenju (510 djece 2018. g.) i dnevni centri su za 163 djeteta osigurali pomoć u učenju, tople obroke i usluge pranja rublja, a od toga je 17 djece smješteno u skloništa. Dnevni centri nemaju resurse, kapacitete i osoblje i mogli su osigurati samo osnovnu hranu, organizirati radionice i pružiti kratkoročan smještaj za mali broj djece. Promatrači su izvijestili da su pripadnici mobilnog tima bili napadnuti, da su bili izloženi prijetnjama i zastrašivanju od strane trgovaca ljudima i počinitelja u toku rada na terenu, ali istraga nije pokrenuta.

Sredstva dodijeljena za pomoć žrtvama su disproportionalno niža za domaće žrtve, iako one čine većinu identificiranih žrtava. Vlasti nisu kombinirale sredstva pomoći domaćim i stranim žrtvama i neiskorištena sredstva dodijeljena za pomoć stranim žrtvama su vratile u državni budžet, umjesto da su ih preraspodijelile za pomoć domaćim žrtvama. Zbog toga, neke domaće žrtve nisu imale pristup pomoći. Vlasti su u saradnji s nevladinim organizacijama pružile smještaj, psihosocijalnu podršku, medicinsku pomoć, pravnu pomoć i starateljstvo za djecu. Međutim, pristup mjerama zaštite nije standardiziran i temeljen je na aktima koji nisu pravno obavezujući; prema zakonu u Republici Srpskoj (RS), žrtve trgovine ljudima imaju pravo na socijalnu pomoć, dok u Federaciji BiH (FBiH) i Brčko distriktu BiH (BD) žrtve nisu zakonom obuhvaćene kada se radi o toj vrsti pomoći.

Romi su posebno podložni trgovini ljudima u Bosni i Hercegovini. Istražitelji su vraćali djecu porodicama, čak i kada su te porodice učestvovalе u trgovini djecom. Romske zajednice nisu uključivane u vladine rasprave o mjerama za borbu protiv trgovine ljudima, uprkos statusu čestih žrtava iz romskih zajednica.<sup>4</sup>

Međunarodne organizacije izvijestile su da su policija i socijalni radnici u centrima za socijalni rad opravdavali slučajeve potencijalnog prosjačenja na koje su primorana djeca i prisilni rad u kojem su žrtve Romi kao tradicionalne kulturološke prakse i običaje Roma i ponekad su vraćali djecu u njihove porodice čak i kada su roditelji bili uključeni u eksploataciju svoje djece. Osim toga, u izvještaju jedne međunarodne organizacije ukazano je na nepostojanje standardnih procedura i pokazatelja trgovine ljudima za migrantske tokove, pitanja koja se postavljaju tokom intervjua i prevodioce, te opće sposobnosti skrininga velikog priliva migranata i izbjeglica u institucijama čiji službenici prvi dolaze u kontakt s potencijalnim žrtvama, među njima Granična policija, lokalna policija, Služba za poslove sa strancima i centri za socijalni rad. Službenici koji dolaze prvi u kontakt s potencijalnim žrtvama su upućivali potencijalne žrtve trgovine ljudima na policiju koja je s njima obavljala razgovor i koja je ovlaštena da obavi zvaničnu identifikaciju žrtve. Međutim, međunarodne organizacije su izvijestile da vođenje intervjua i postupak identifikacije nisu transparentni i da neke institucije traže od žrtava da sarađuju u istrazi i krivičnom postupku kako bi dobile pomoć i podršku.

Vlasti su djelomično finansirale četiri sigurne kuće koje vode nevladine organizacije, s tim da je prema programima državne pomoći potreban zvaničan status žrtve da bi žrtve ostvarile pravo na zaštitu, a potencijalne žrtve su primile pomoć samo kada je neka nevladina organizacija imala sredstva iz drugih

<sup>4</sup> <https://borgenproject.org/human-trafficking-in-bosnia-and-herzegovina/>



izvora; nadležni organi su tokom 2020. godine uputili 41 žrtvu u sigurne kuće koje vode nevladine organizacije (38 u 2019. g.).

Vlasti su izvijestile o izradi plana reintegracije za svaku žrtvu, kao i stručnu obuku, ali vlasti nisu osigurale sredstva za programe reintegracije i promatrači su izvijestili o slučajevima u kojima žrtve provedu nekoliko godina u skloništima uslijed sporih sudskih postupaka i nedostatka mogućnosti reintegracije.

U januaru 2020. g. usvojena je Strategija suprotstavljanja trgovini ljudima u BiH 2020-2023. Osim toga, državni koordinator organizirao je sastanke kako bi dobio informacije o regionalnim koordinacionim timovima i u skladu s tim je promijenio njihovu strukturu s četiri na 18 regionalnih timova; deset u FBiH, šest u RS-u; jedan u BD; i jedan krovni tim na državnom nivou.

## Oblasti javnog poziva

Projektni prijedlozi trebaju se odnositi na oblasti koje se vežu za pružanje podrške borbi protiv trgovine ljudima u BiH koje uključuju izgradnju ispravnog shvatanja i razumijevanja građana i profesionalaca o trgovini ljudima, njenim oblicima, uzrocima, rizicima i načinu reagiranja u slučajevima prepoznavanja rizičnih situacija i ugroženosti pojedinaca i grupa, te izgradnju mehanizama za sprečavanje i ograničavanje mogućnosti nastanka i opstajanja trgovine ljudima, koji će poticati pravilnu reakciju organa formalne socijalne kontrole u stvaranju ambijenta osnaživanja društveno prihvatljivih oblika ponašanja i razvijanja održivih sistema ranog upozoravanja o slučajevima trgovine ljudima, a posebno kroz:

- aktivnosti koje preveniraju trgovinu ljudima kroz socijalne, ekonomske i druge mjere za rizične grupe, uključujući rad na terenu u romskim i drugim rizičnim zajednicama, unaprjeđenje rodno jednakosti i suzbijanje rodno zasnovanog nasilja,
- osiguranje održivih programa i procedura za proaktivnu zaštitu i pomoć za žrtve svih oblika trgovine ljudima u Bosni i Hercegovini, posebno ranjivih grupa,
- unaprjeđenje identifikacije potencijalnih žrtava trgovine ljudima i žrtava trgovine ljudima,
- edukaciju nepolicijskih službenika/ca koji prvi dolaze u kontakt s potencijalnim žrtvama o identifikaciji potencijalnih žrtava i žrtava trgovine ljudima,
- pružanje usluga pomoći žrtvama trgovine ljudima uključujući medicinske, repatrijacijske, pravne, transportne usluge itd.,
- aktivnosti koje se naslanjaju na već postojeće i efektivne aktivnosti interesno-utjecajnih skupina koje se bave borbom protiv trgovine ljudima u BiH, u domeni sprječavanja trgovine ljudima i direktne pomoći žrtvama trgovine ljudima.
- aktivnosti na unaprjeđenju položaja žrtava trgovine ljudima u BiH,
- zagovaranje ka svim nivoima vlasti za unaprjeđenje prava i položaja žrtava trgovine ljudima u BiH, koristeći, između ostalog, i javne kampanje u zagovaračkim aktivnostima,
- razvoj kapaciteta organizacija koje se bave problemom trgovine ljudima,
- tehničku pomoć nadležnim institucijama BiH u pružanju pomoći žrtvama trgovine ljudima i u borbi protiv trgovine ljudima, u vidu pomoći u medicinskim, repatrijacijskim, pravnim, transportnim uslugama i sl.



## Uvjeti i procedure za apliciranje

USAID/INSPIRE otvara fond za grantove usmjerene na pružanje podrške aktivnostima borbi protiv trgovine ljudima u BiH. Projektni prijedlozi mogu se dostavljati za cjelokupni ili djelomični iznos sredstava potrebnih za implementaciju kandidiranog projekta.

Minimalni iznos sredstava koja se traže od USAID/INSPIRE ne može biti manji od 50.000 BAM a maksimalan iznos traženih sredstava ne može prelaziti 250.000 BAM.

Trajanje projekta ne može biti kraće od 6 mjeseci ni duže od 24 mjeseca.

Tokom implementacije projekata aplikant će biti odgovoran za upravljanje sadržajnim i finansijskim dijelom projekta, kao i za narativno i finansijsko izvještavanje prema USAID/INSPIRE-u.

Aplikacije i tražena dokumentacija moraju biti napisane na jednom od službenih jezika i pisama Bosne i Hercegovine. Aplikacije moraju biti popunjene elektronski.

Nepotpune aplikacije, aplikacije koje pristignu nakon navedenog roka, aplikacije koje ne budu dostavljene na predviđeni način, kao i prijave na neodgovarajućim obrascima neće biti uzete u razmatranje. Dokumentacija koja bude dostavljena, a nije tražena, neće biti uzeta u razmatranje.

Sva pitanja koja se tiču ovog javnog poziva dostavljaju se isključivo putem e-mail adrese: [prijava@usaidinspire.ba](mailto:prijava@usaidinspire.ba) (subject/predmet: 20.04.0-N2.3-499, Upit) do 9.4.2021. godine.

### I. faza

Projektni prijedlozi dostavljaju se najprije samo u formi nacrt projektnog prijedloga, koja se nalazi na online platformi za upravljanje grantovima APPLY.

Pored nacrt projektnog prijedloga potrebno je dostaviti rješenje o registraciji pravnog lica ili izvod iz registra (dokument ne smije biti stariji od godinu dana), te uvjerenje o poreskoj registraciji (ID broj).

Aplikacije koje umjesto u obrascu za nacrt projektnog prijedloga budu dostavljene u obrascu za cijeli projektni prijedlog neće biti uzete u razmatranje.

Svaka organizacija može aplicirati s najviše jednim nacrtom projektnog prijedloga u okviru ovog javnog poziva. U slučaju da neka organizacija dostavi više od jednog projekta, u obzir će se uzeti samo prva pristigla aplikacija.

Aplikanti mogu, ali ne moraju imati partnera u projektu. Partneri u projektu mogu biti nevladine organizacije (udruženja i fondacije) registrirane u BiH ili institucije vlasti s nekog od nivoa u BiH. Izjavu o partnerstvu bi bilo potrebno dostaviti u 2. fazi, ukoliko aplikant bude odabran za učešće u 2. fazi.

Komisija za evaluaciju USAID/INSPIRE obavlja preliminarnu ocjenu projektnih prijedloga na osnovi informacija i dokumentacije koju su predali aplikanti.

Preliminarni pregled obuhvata sljedeće kriterije:

1. cjelovitost prijave:
  - komisija za evaluaciju će ocijeniti je li dostavljena sva dokumentacija koja je u pozivu navedena kao obavezna;
2. usklađenost s kriterijima za odabir:



- na osnovu primljene dokumentacije, Komisija za evaluaciju će ocijeniti ispunjava li aplikant kriterije za odabir;
- 3. prethodno ostvareni rezultati u sektoru unutar kojeg se organizacija prijavljuje na poziv:
  - Žrtve trgovine ljudima su jedna od glavnih ciljnih korisničkih grupa aktivnosti koje provodi organizacija;
  - organizacija se trenutno bavi pitanjima borbe protiv trgovine ljudima.

Komisija za evaluaciju kontaktirat će osobe navedene za kontakt i preporuke kako bi se provjerili podaci o prethodno ostvarenim rezultatima.

Prilikom ocjene nacrtu projektnih prijedloga uzet će se u obzir sljedeće:

- organizacije imaju specifičan, odgovoran pristup i metodologiju rada sa žrtvama trgovine ljudima,
- nacrti projektnih prijedloga dostavljeni su od strane organizacija koje intenzivno rade sa žrtvama trgovine ljudima i na problematici trgovine ljudima u BiH, te promoviranju prava žrtava trgovine ljudima,
- očekivani rezultati uključuju izravnu podršku ili zagovaranje u ime žrtava trgovine ljudima,
- organizacije pružaju tehničku pomoć institucijama u BiH koje se bave borbom protiv trgovine ljudima i pravima žrtava trgovine ljudima, koje nastoje uključiti u politike, programe i strategije,
- predloženi projekt predviđa direktnu saradnju sa žrtvama trgovine ljudima,
- predloženi projekt ne temelji se isključivo na izradi i distribuciji promotivnog i zagovaračkog materijala,
- iz predloženog projekta vidljivo je da postoje realne mogućnosti da se postigne rezultat tokom trajanja projekta ili netom nakon toga,
- stječe se dojam da pomoć i stručnost USAID-a može biti od koristi, te ih dopunjava i jača organizacijske kapacitete, vještine i znanja,
- organizacije pokazuju sposobnost za uspješno partnerstvo s vlastima, drugim organizacijama i raznim interesnim stranama koji rade s marginaliziranom populacijom u BiH,
- predloženi projekt promovira održivost ostvarenih projektnih ciljeva i rezultata,
- organizacije stvaraju sinergiju tako što uključuju druge organizacije kao partnere ili potprimaocce sredstava,
- predloženi projekt nije nastavak, dopuna ili ponavljanje nekog drugog tekućeg ili završenog projekta.

Nakon što Komisija ocijeni i rangira sve pristigle nacрте projektnih prijedloga, svi aplikanti bit će informirani o ishodu ocjene njihove aplikacije putem online platforme za upravljanje grantovima APPLY. Oni projektni prijedlozi koji budu pozitivno ocijenjeni ulaze u 2. fazu apliciranja.

## 2. faza

Od aplikanta koji budu obaviješteni da su uspješno prošli 1. fazu zatražit će se da dostave cijeli projektni prijedlog, koji se može popuniti putem online platforme za upravljanje grantovima APPLY, budžet na obrascu OBR-INS-GRB, te ispunjenu Izjavu o partnerstvu, na obrascu OBR-INS-PAR (isključivo ukoliko organizacija ima partnera u projektu).

Nakon procjene cijelih projektnih prijedloga svi aplikanti bit će informirani o ishodu ocjene njihove aplikacije putem online platforme za upravljanje grantovima APPLY.



Oni projektni prijedlozi koji budu pozitivno ocijenjeni ulaze u fazu pregovora o dodjeli granta i fazu potpisivanja ugovora. U fazi pregovora će USAID/INSPIRE i aplikant usaglasiti projektni prijedlog, naročito dijelove koji se odnose na isporuke, monitoring i evaluaciju projekta. Obavijest o pozitivnoj ocjeni projektnog prijedloga ne znači neminovno da će USAID/INSPIRE s organizacijom potpisati ugovor niti da će projektni prijedlog biti financiran. Potpisivanjem ugovora o dodjeli granta uređuju se međusobni odnosi saradnje, prava i obaveze obje ugovorne strane.

## Uvjeti dodjele granta

Organizacije koje budu imale najbolje projektne prijedloge i budu odabrane u užu krug kandidata dužne su omogućiti USAID/INSPIRE da provede predgrantovsku procjenu rada i poslovanja organizacije u prethodnom periodu. Predgrantovska procjena podrazumijeva analizu organizacijskih, finansijskih, administrativnih i ljudskih resursa aplikanta.

Samo organizacije čiji projekti budu najbolje ocijenjeni i koje uspješno prođu proces predgrantovske procjene mogu biti korisnici granta.

Potpis ugovora o dodjeli granta podrazumijeva, pored implementacije projektnih aktivnosti, i spremnost organizacija da aktivno učestvuju u razvoju svojih organizacijskih kapaciteta uz punu podršku USAID/INSPIRE.

Razvoj organizacijskih kapaciteta podrazumijeva:

- implementaciju nalaza i preporuka iz predgrantovske procjene;
- učešće na edukacijama i treninzima koje organizira USAID/INSPIRE;
- korištenje KULT/ROK alata za samoprocjenu organizacijskih kapaciteta i provođenje POK<sup>5</sup> i POP<sup>6</sup> procesa jačanja i razvoja kapaciteta i performansi organizacije;
- aktivan rad na unaprjeđenju postojećih pravilnika i procedura koji uređuju rad organizacije, tamo gdje to bude potrebno.

## Rok za dostavljanje nacrt projektnog prijedloga

Od aplikanta se traži da **do 15. 4. 2021. do 16.00 sati** dostave nacrt projektnog prijedloga u elektronskom obliku, sa svim traženim priložima, putem online platforme za upravljanje grantovima APPLY, nakon čega će aplikanti odmah dobiti automatski e-mail kao potvrdu o prijemu aplikacije. Nacrti projektnih prijedloga koji ne budu dostavljeni na navedeni način, neće biti uzeti u razmatranje. Aplikanti koji ne zaprimu automatski odgovor o prijemu aplikacije u roku od 30 minuta od slanja trebaju se odmah javiti na elektronsku adresu [prijava@usaidinspire.ba](mailto:prijava@usaidinspire.ba) (subject/predmet: 20.04.0-N2.3-499, Upit).

Napomena: Svi potencijalni aplikanti trebaju pristupiti registraciji na online platformu za upravljanje grantovima APPLY putem linka: <https://KULT.smapply.io/prog/inspire> čim prije, kako bi se upoznali s uvjetima i tehničkim postavkama aplikacije. Detaljne instrukcije o procesu registracije mogu pronaći na linku: <https://kult.smapply.io/res/p/tehnicke-instrukcije/>

U slučaju izmjene Javnog poziva USAID/INSPIRE će objaviti tekst s naglašenim izmjenama na <https://kult.smapply.io/res/p/komponenta1>.

<sup>5</sup> POK™ – alat za procjenu organizacijskih kapaciteta

<sup>6</sup> POP™ – alat za procjenu organizacijskih performansi